

KOMORA MAGISTARA FARMACIJE KANTONA SARAJEVO

Tešanjaska 24 A/14 71 000 Sarajevo

Tel./Fax: + 387 33 214 967

Na osnovu članka 222. Zakona o zdravstvenoj zaštiti («Službene novine F BiH», broj: 46/10) i članka 10./stavak 1./tačka 9. Statuta Komore magistara farmacije Kantona Sarajevo, Upravni odbor Komore magistara farmacije Kantona Sarajevo na svojoj IX sjednici održanoj 20.01.2014. godine donosi

P R A V I L N I K

O POSTUPKU IZDAVANJA, OBNAVLJANJA I ODUZIMANJA ODOBRENJA ZA SAMOSTALAN RAD MAGISTARA FARMACIJE

I – OPĆE ODREDBE

Članak 1.

Ovim pravilnikom se utvrđuju uvjeti, način i postupak izdavanja, obnavljanja i oduzimanja odobrenja za samostalan rad – licence magistara farmacije (u daljem tekstu: **licenca**), članova Komore magistara farmacije Kantona Sarajevo (u daljem tekstu: **Komora**).

Članak 2.

Komora izdaje licencu magistru farmacije nakon primitka zahtjeva, te kopije diplome o završenom farmaceutskom fakultetu i položenom stručnom ispitu, kao i ostale potrebne dokumentacije.

Izdavanje licence se vrši uz naknadu.

Visina nakande izdavanja licence se određuje odlukom Upravnog odbora Komore.

Članak 3.

Licenca je javna isprava kojom magistar farmacije stiče pravo samostalnog obavljanja poslova u svojoj struci na području Kantona Sarajevo.

Članak 4.

Radi dobijanja licence, magistar farmacije predsjedniku Komore dostavlja slijedeće:

- zahtjev;
- original ili ovjerenu kopiju potvrde mjesta prebivališta izdatu od strane nadležnog organa – CIPS, ne stariju od 6 mjeseci;
- ovjerenu kopiju lične karte;
- Original ili ovjerenu kopiju Uvjerenja o državljanstvu Federacije Bosne i Hercegovine, odnosno Bosne i Hercegovine ili ovjerenu kopiju;
- uvjerenje o diplomiranju ili ovjerenu kopiju;
- uvjerenje o položenom stručnom ispitu ili ovjerenu kopiju.

U slučaju sticanja zvanja magistar farmacije na Farmaceutskom fakultetu izvan prostora Bosne i Hercegovine, a nakon 1992. godine, potrebno je dostaviti i:

- uvjerenje o izvršenoj u nostrifikaciji ili ovjerenu kopiju.

Magistri farmacije, strani državljani, osim dokumentacije navedene u stavku 1. ovog članka odnosno stavku 2. ovog članka, dužni su dostaviti i:

- ovjerenu kopiju Radne dozvole izdate od strane nadležne institucije,
- ovjerenu kopiju ličnog dokumenta (lične karte ili pasoša).

Članak 5.

Magistar farmacije koji je položio specijalistički, odnosno subspecijalistički ispit, pored dokumentacije iz članka 4. ovog pravilnika, uz zahtjev za izdavanje licence, dužan je dostaviti i ovjerenu fotokopiju uvjerenja o položenom specijalističkom, odnosno subspecijalističkom ispitu.

Magistar farmacije koji je stekao akademsku titulu, nastavno-naučno znanje, odnosno naziv primarijus, dužan je dostaviti i ovjerenu fotokopiju uvjerenja o stečenoj akademskoj tituli, odnosno nastavno-naučnom zvanju ili počasnom nazivu primarijus.

Članak 6.

Zahtjev za izdavanje licence podnosi se putem Stručne službe Komore.

Članak 7.

Nakon primitka zahtjeva i prateće dokumentacije navedene u članku 4. ovog pravilnika, predsjednik Komore izdaje licencu magistru farmacije čiji sadržaj i izgled su propisani *Pravilnikom o postupku izdavanja licence, kao i sadržaju i izgledu licence* («Službene novine FBiH», broj: 82/13).

II – IZGLED I SADRŽAJ LICENCE

Članak 8.

Licenca mora sadržavati slijedeće podatke: (Licenca u prilogu Pravilnika)

- ime, ime jednog roditelja i prezime magistra farmacije,
- datum, mjesto i država rođenja magistra farmacije
- stručni naziv, naučnu i počasnu titulu,
- datum i mjesto polaganja stručnog ispita i naznačenje ispitne komisije
- stručna oblast za koju se licenca izdaje
- rok važenja licence,
- broj licence,
- datum i mjesto izdavanja,
- potpis predsjednika Komore,
- pečat Komore,

Članak 9.

Licenca može biti redovna i privremena.

Redovna licenca izdaje se za period od šest (6) godina.

Privremena licenca izdaje se za period od godinu dana.

Članak 10.

Licenca se izdaje magistru farmacije na period od šest (6) godina.

Komora, najkasnije 90 dana prije isteka važenja licence, obavještava magistra farmacije o obavezi obnavljanja iste.

Članak 11.

Postupak produženja licence magistra farmacije provodi se vrednovanjem stručnog usavršavanja .

Stručno usavršavanje i provjera stručnosti magistra farmacije regulirano je posebnim *Pravilnikom o oblicima, postupcima i rokovima stručnog usavršavanja i provjere stručnosti magistara farmacije*, koji donosi Komora.

Članak 12.

Predsjednik Komore, najkasnije u roku od 30 dana od dana primitka zahtjeva, donosi Odluku o obnavljanju licence, odnosno Odluku o odbijanju zahtjeva za obnavljanje licence.

Uz zahtjev za obnovu licence, magistar farmacije, prilaže potvrdu iz koje je vidljivo da imenovani ispunjava uvjete iz *Pravilnika o oblicima, postupcima i rokovima stručnog usavršavanja i provjere stručnosti magistara farmacije*.

U slučaju neslaganja sa donesenom Odlukom iz stavka 1. ovog članka, magistar farmacije ima pravo ulaganja prigovora, u roku od 8 dana od primitka Odluke, Upravnom odboru Komore.

Upravni odbor Komore donosi konačnu odluku, najkasnije u roku od 30 dana od dana ulaganja prigovora.

U slučaju obnavljanja licence, Komora izdaje magistru farmacije novu licencu sa istim rednim brojem, ali godinom i datumom u kojoj se obnavlja licenca.

Članak 13.

Magistar farmacije koji nije, u skladu sa *Pravilnikom o oblicima, postupcima i rokovima stručnog usavršavanja i provjere stručnosti magistara farmacije*, u roku od šest (6) godina skupio potreban broj bodova, ne može obnoviti licencu, osim u slučaju da sakupi odgovarajući broj bodova kroz dodatno usavršavanje.

Članak 14.

Magistar farmacije, član komore, dužan je blagovremeno obavijestiti komoru o svim nastalim promjenama koje su od uticaja na izdatu licencu (stečen stručni naziv specijalista, odnosno subspecijalista, stečeno zvanje primarijusa, stečeno naučno-nastavno zvanje i sl.), a koje se upisuju u registar članova komore.

Članak 15.

Magistar farmacije može podnijeti zahtjev za obnavljanje licence do navršenih 70 godina života, uz uvjet da svake godine, nakon navršenih 65 godina života, uz zahtjev, predloži uredan liječnički nalaz o zdravstvenoj sposobnosti.

III – ODUZIMANJE LICENCE

Članak 16.

Oduzimanje licence može biti privremeno i trajno.

Privremeno oduzimanje licence je na period od godinu dana, odnosno dok traju razlozi na osnovu kojih je oduzeta licenca.

Privremeno oduzeta, odnosno ograničena licenca, nakon isteka vremena na koje je oduzeta odnosno ograničena, nastavlja važiti do datuma do kojeg je izdata.

Članak 17.

Licenca se oduzima privremeno:

- ako magistar farmacije izvan punog radnog vremena obavlja poslove u suprotnosti sa odredbama Zakona o zdravstvenoj zaštiti ("Službene novine Federacije BiH", broj: 46/10);

- ako je magistru farmacije Sud Časti izrekao sankciju u skladu sa člankom 39./alineje 4. i 6. Poslovnika o radu Suda Časti;
- ako magistar farmacije bude pravomoćnom sudskom presudom osuđen na kaznu zatvora duže od šest (6) mjeseci, ili bude izrečena mjera sigurnosti, a posebice mjera sigurnosti zabrane vršenja poziva, djelatnosti ili dužnosti;
- ako dođe do težih povreda obavljanja farmaceutske djelatnosti i narušavanja ugleda farmaceutske profesije;
- zloupotrebom svog (službenog) položaja;
- ako se očigledno nesavjesno i neodgovorno obavljaju izborne funkcije, odnosno funkcije na koje je imenovan/a u organima Komore;
- Ako se ne ponaša u skladu sa Kodeksom farmaceutske etike i deontologije, odnosno svako kršenje Kodeksa farmaceutske etike i deontologije koje bi moglo ili je uzrokovalo nastupanje posljedica za druge (pacijente, članove,...);
- u slučaju grubog narušavanja ugleda Komore;
- ako iz neopravdanih razloga ne plaća članarinu šest (6) mjeseci i duže.

Članak 18.

Po isteku perioda na koji je licenca oduzeta, magistar farmacije podnosi predsjedniku Komore zahtjev za ponovno izdavanje licence.

Ukoliko su ispunjeni svi uvjeti za izdavanje licence, predsjednik Komore obavezan je, najkasnije u roku od 30 dana od dana primitka zahtjeva i dokaza o ispunjavanju svih uvjeta, donijeti Odluku o ponovnom izdavanju licence.

Ukoliko magistar farmacije ponovi neki od razloga navedenih u članku 13. ovog pravilnika, licenca se oduzima trajno.

Članak 19.

Osim razloga navedenih u članku 14./stavak 3. ovog pravilnika, licenca se može oduzeti trajno i u slučajevima:

- ako se utvrdi da magistar farmacije svojim radom ugrožava život i zdravlje pacijenata;
- ako je magistru farmacije Sud Časti izrekao sankciju u skladu sa člankom 39./alineja 5. Poslovnika o radu Suda Časti;
- ako magistar farmacije bude pravomoćnom sudskom presudom osuđen na kaznu zatvora duže od šest (6) mjeseci, ili bude izrečena mjera sigurnosti, a posebice mjera sigurnosti zabrane vršenja poziva, sjelatnosti i dužnosti;

- ako dođe do izričito teških povreda obavljanja farmaceutske djelatnosti i narušavanja ugleda farmaceutske profesije;
- izričito grubim kršenjem Kodeksa farmaceutske etike i deontologije, odnosno svako kršenje Kodeksa farmaceutske etike i deontologije koje bi moglo ili je uzrokovalo nastupanje izrazito teških posljedica za druge (pacijente, članove,...);
- zloupotrebom svog (službenog) položaja;
- u slučaju izričito grubog narušavanja ugleda Komore.

Članak 20.

Odluku o oduzimanju licence donosi Upravni odbor Komore.

Komora je dužna, bez odlaganja, o privremenom ili trajnom oduzimanje licence magistru farmacije, obavijestiti poslodavca magistra farmacije, Zavod zdravstvenog osiguranja, nadležno ministarstvo kao i nadležnu zdravstvenu inspekciju.

IV – IZDAVANJE DUPLIKATA LICENCE U SLUČAJU GUBITKA, OTUĐENJA, OŠTEĆENJA ILI UNIŠTENJA

Članak 21.

Komora će magistru farmacije na njegov zahtjev izdati duplikat licence u slučaju:

- gubitka licence,
- otuđenja licence,
- oštećenja licence u tolikoj mjeri da nije moguće u cijelosti utvrditi podatke koji su navedeni,
- uništenja licence tako da se više ne može koristiti kao valjan dokument.

Članak 22.

Magistar farmacije je dužan zahtjev za izdavanje duplikata licence iz članka 21. podnijeti Komori u roku od 8 dana od dana saznavanja za gubitak, otuđenje, oštećenje ili uništenje licence.

Članak 23.

Po prijemu zahtjeva, predsjednik Komore izdaje rješenje kojim izgublenu, odnosno otuđenu, oštećenu ili uništenu licencu proglašava nevažećom.

Rješenje iz stavka 1. ovog članka, objavljuje se na web stranici Komore (koja služi kao oglasna ploča Komore).

Duplikat licence, na kojoj je jasno naznačeno „DUPLIKAT”, izdaje se u roku od trideset (30) dana od podnošenja zahtjeva.

Do izdavanja duplikata licence magistru farmacije se izdaje potvrda o predaji zatjeva za izdavanje duplikata licence

Članak 24.

U slučaju naknadnog pronalaska izgubljene ili otuđene licence, magistar farmacije je dužan istu predati Komori.

Oštećenu licencu magistar farmacije je dužan predati Komori.

Iznos naknade za izdavanje duplikata licence odlukom utvrđuje Upravni odbor Komore i iste snosi podnosilac zahtjeva.

V – PRELAZNE I ZAVRŠNE ODREDBE

Članak 25.

Pravilnik stupa na snagu danom donošenja i ostaje na snazi do donošenja izmjena ili dopuna istog.

Broj: 001-P-622/14
Sarajevo, 20.01.2014. godine

V.d. Predsjednika Upravnog odbora
Dr.sci. Dženita Softić prim.mr.ph.spec.

